


Poipoia ngā tamariki

How whānau and teachers support tamariki Māori to be successful in learning and education—COMPASS

He whakarāpopototanga



Nicola Bright me Melinda Webber

Te kaupapa COMPASS

He pātuitanga te kaupapa COMPASS i waenga i a Rangahau Mātauranga o Aotearoa | New Zealand Council for Educational Research (NZCER) me Ahorangi Melinda Webber nō Waipapa Taumata Rau (The University of Auckland). He wāhanga tēnei nō te hōtaka rangahau Te Pae Tawhiti o Rangahau Mātauranga o Aotearoa, Takuhe Kāwanatanga, e tautokona ā-pūteatia ana e Te Tāhuhu o Te Mātauranga.

Poipoia ngā Tamariki: How Whānau and Teachers Support Tamariki Māori to be Successful in Learning and Education te pūrongo COMPASS tuatoru i hua ake i te pāhekohekotanga i waenga i a Rangahau Mātauranga o Aotearoa me Ahorangi Melinda Webber mō te tātaritanga raraunga i kohia mā roto i tana kaupapa rangahau ā-motu Kia Tū Rangatira Ai: Living, Thriving and Succeeding in Education.

Tā tēnei rangahau kaupapa Māori he tiri i ngā whakaaro pūmau o ngā whānau me pēhea e tino pai ai tā rātou tautoko ko ngā kaiako i ngā tamariki kia eke ki ngā taumata o te akoranga, o te mātauranga.

He kitenga

He aha te angitu ki tā te whānau titiro?

Ki ngā whānau, te tikanga o te angitu i te akoranga me te mātauranga kia tupu pakari te tūāpapa ā-pāpori, ā-kare-ā-roto, ā-ahurea hoki o ā rātou tamariki, e eke ai rātou ki ngā taumata i tō rātou ao, i roto hoki i te akoranga. Ka tino mōhio rātou he tino tangata rātou, kua mōhio ki tō rātou tuakiri, me tō rātou tūrangawaewae. Kua tupu hoki ō rātou āhukatanga e whakatairangatia nei e te whānau he āhukatanga taketake nō te tangata tū pakari i te ao, nō te tangata e pīrangitia ana e ētahi atu, ā, ko ēnei āhukatanga ka tukuna iho i roto i te whānau ki tēnā whakatupuranga, ki tēnā whakatupuranga.

Tuarua, e ai ki te whānau kua tū pakari te tamariki ina ngahau rātou ki te akoranga, ina whai rātou i ō rātou kaingākoutanga, ina tutuki i a rātou ō rātou whāinga akoranga, whāinga tohu mātauranga hoki. Ko te tikanga o te angitu mō te tamariki, e hari ana rātou mō tō rātou ahurea me tō rātou reo, ka taea te kuhu haere noa ki roto i te ao Māori. Ka taea e rātou te urutomo ki ngā whāinga wāhi hei whakatutuki i ō rātou moemoeā, te whakamanawanui hoki i a rātou e hīkoi ana, ahakoa ngā piki me ngā heke i te ara.

E tino hāngai ana ngā whakaaro o ngā whānau ki te angitu, me te mōhio me pēhea rātou e āwhina ai i ā rātou tamariki kia eke ki ngā taumata, kia tino whai mana, ki ngā tino āhukatanga pai rawa e tākina ana i te mana model, nā Webber rāua ko Macfarlane i tārei (2020). Tā tēnei tauira he tautohu i ngā āhukatanga tangata takitahi, āhukatanga whānau, āhukatanga kura, āhukatanga hapori e rima hei tautoko i ngā ākonga Māori kia tutuki ō rātou whāinga mātauranga, pāpori, whāinga ahurea anō hoki. I roto i te mana model, ko ngā āhukatanga taketake tino pai e rima mō te angitu ākonga Māori, ko ēnei: Ko te Mana Whānau (te tū tangata o te whānau); ko te Mana Motuhake (te tū tangata whaiaro me te mōhio ki ngā ekenga taumata tūturu); ko te Mana Tū (te pakari me te tū rangatira); te Mana Ūkaipō (te piri ki te ūkaipō me te whānau nui tonu); me te Mana Tangatarua (te mātauranga me ngā pūkenga torowhānui).

Poipoia te tamaiti

Ngā mahi hira rawa e whā hei mahi mā te whānau e eke ai ngā tamariki ki ngā taumata

Ko ngā mahi hira rawa e whā hei mahi mā te whānau hei tautoko i ā rātou tamariki kia eke ki ngā taumata:

- he aroha, he manaaki i a rātou
- he whakatenatena, he tautoko i a rātou
- he poipoi i ngā waiaro pai ki te mātauranga
- he whakauru rawa ki ngā akoranga i te kāinga, i te kura anō hoki.

I roto i te pūnaha tautoko matatini o te whānau, ka haere ētahi āhuetanga o ēnei mea katoa i te wā kotahi. Ko te tautiaki i ngā āhuetanga katoa o te toiora o ā rātou tamariki me te whakatenatena i a rātou kia tutuki i ō rātou moemoeā mō te ako—otirā, ko ngā moemoeā ēnei o ō rātou whānau—ka noho hei mea hira rawa ki ngā whānau. E tino whakapono ana anō hoki ngā whānau he mea tino nui kia kite ngā tamariki he mea hira ki a rātou te akoranga me te mātauranga mā te whai wāhi ki te akoranga me te mātauranga i te kāinga me te kura. Mō te whānau, he mea tino hira kia pai ngā hononga o te tamariki ki te tangata kē, kia whai wheako ako ngahau, kia pakari ai tō rātou tū mō ngā whiringa kei mua i a rātou, mō te ara whakamua.

Te Tuakiritanga Te tū tangata me te pakari, mā te tuakiri ahurea Māori e whakapūmau

I kitea e te rangahau he maha ngā hua o te tuakiri ahurea Māori mā te tamariki. He mea hira te whakaaro o te tangata mō tōna tūrangawaewae, tōna piri ki ētahi atu, me tōna tū tangata, i takea mai i tōna tuakiri, hei hanga tūāpapa ahurea takatika mō te tamariki. Ki te titiro a ngā whānau, hei wawao hoki te tuakiri Māori i te tangata. Ki te whakaaro o ngā whānau he mea hira te tū pakari o ngā tamariki Māori i roto i tōna tuakiri Māori hei pou mō ana whakaaro pai mōna anō, me tōna pakari i roto i te whāinga i te mātauranga. Hei āwhina hoki tēnei i te whanaketanga o te whāinga hua ahurea me ōna pūmanawa mō te arotahi ki āna mahi, hei whakapūmau hoki i te ū ki te whakatutuki i ngā moemoeā i te kura, hei painga mō te whānau katoa.

Kia whakaohoho He tauira tangata whakahihiri i te wairua

Ka kitea he tauira whakahihiri i te tangata mō te whānau, i tēnā whakatupuranga, i tēnā whakatupuranga. E whakaae tahi ana ngā whānau me ngā ākongā ko ngā mātua tonu ngā tino tauira hira i te oranga o te tamaiti. E hāngai pū ana ngā whakaaro o ngā whānau mō ngā tauira whakaohoho ki ngā whakaaro o ngā ākongā mō aua tū tauira whai hononga wā roa, whai painga hoki ki ngā tamariki, ka whakaahua i ngā uara me ngā āhuetanga tangata ka whakanuia e te tangata kē, ka tahuri ā-tinana hoki ki te āwhina i ngā tamariki.

Ko tētahi o ngā kitenga whai tikanga hoki i puta i tēnei rangahau, mō te nuinga, he kaha kē atu te awe o ngā mātua mō ngā moemoeā o ā rātou tamariki, i tā ngā mātua i mōhio ai. Kāore pea ngā mātua, hei rōpū, e mōhio ana ki te kaha o te titiro o ā rātou tamariki ki a rātou, arā, ki ō rātou mātua hei tangata whakaohoho i a rātou, hei tauira hoki mō rātou.

Ngā mahi tino pai e rima ka taea te mahi e ngā kaiako hei āwhina i ngā tamariki kia eke ki ngā taumata

He tūranga hira rawa tō te kaiako ki te tautoko i ngā tamariki kia eke ki ngā taumata i te mātauranga. He rite tonu te tini o ngā mahi e mahia ana e rātou hei tautoko i ngā tamariki ki ngā mahi e mahia ana e ngā whānau i te kāinga. Ko ngā mea tino pai e mahia ana ngā kaiako hei tautoko i ngā tamariki kia eke ki ngā taumata, ki ngā whakaaro o ngā whānau, kia:

1. whakatenatena, kia tautoko i ngā tamariki
2. mōhio, kia atawhai hoki i ngā tamariki
3. whakarongo ki ngā tamariki
4. whakaako i ngā mahi me ngā hiahia o ngā tāngata takitahi
5. whakatinana i ngā āhuatanga me ngā painga e whakatairangatia ana e ngā whānau.

He mea tino nui ki ngā whānau te mātauranga ka mauria mai e ngā kaiako mō te tautohu i ngā kahanga me ngā hiahia ako o te tamaiti takitahi. E tino whakatairanga ana rātou i ngā kaiako ka taea e rātou te tārei i ō rātou tikanga whakaako hei tino tautoko i ngā kahanga, i ngā hiahia, me ngā kaingākautanga, me te whakatinana akoranga kia ngahau ki ngā tamariki.

Ētahi āwangawanga

Ko te kaikiri ki a ngāi Māori i roto i ngā kura, me te whāiti o te wātea mai o ngā akoranga arareo Māori ētahi take e āwangawanga nei ngā whānau. Me mātua whakatinana mahi takatika, ngoto rawa ki ngā pūtake i ngā taumata pūnaha, taumata whakahaere hoki, e turakina ai ēnei maioro mō te angitu Māori.

He pānga takatika tō ngā tauira whakaohoho mō ngā putanga mō ngā ākongā. Ahakoa tērā, i kitea e mātou tērā ētahi tamariki kāore kau he tauira whakaohoho mō rātou. Ina whakaarotia te hira o ngā tauira whakaohoho, ka puta te pātai, me pēhea te tautoko i ēnei tamariki.

He kupu whakakapi

Tā tēnei rangahau he tāpae kōrero mō te māramatanga, te whakaae, me te whakanui i te wāhi hira o te whānau me te tuakiri Māori mō te āwhina i ngā tamariki Māori kia eke ki ngā taumata. Ahakoa ko te angitu i te ao o te kura te aronga matua, i kitea e tēnei rangahau ko ngā tūāpapa pāpori, tūāpapa hinengaro, ahurea hoki ka tupu mō te tamariki, i roto i ngā āwhina a te whānau, ka meatia hoki hei painga mō te tamariki kia piki ki te angitu i ngā wāhanga katoa o tōna ao.

